

I. DISPOSICIÓN XERAIS

XEFATURA DO ESTADO

2435 *Real decreto lei 2/2015, do 6 de marzo, polo que se adoptan medidas urxentes para reparar os danos causados polas inundacións e outros efectos dos temporais de chuvia, neve e vento acaecidos nos meses de xaneiro, febreiro e marzo de 2015.*

Desde os últimos días do mes de xaneiro e durante boa parte do mes de febreiro sucesivos temporais de choiva, neve e vento azoutaron a práctica totalidade do territorio nacional, como consecuencia, primeiro, dunha fronte atlántica que comezou a afectar as costas do Cantábrico, con ondas de máis de oito metros e ventos do norte de grande intensidade e, seguidamente, pola irrupción de masas de aire frío proveniente do interior do continente europeo, que provocaron acusados descenso das temperaturas.

A concorrencia de fenómenos invernales extremos, con nevadas de excepcional intensidade e choivas persistentes que provocaron inundacións e desbordamentos en diferentes bacías hidrográficas, obrigou a activar os plans territoriais ou especiais de protección civil nas comunidades autónomas de Galicia, Asturias, Cantabria, País Vasco, Castilla y León, Navarra, La Rioja, Aragón e Cataluña.

Engádesse a iso a sucesión de fenómenos meteorolóxicos adversos de vento e mar que azoutaron as costas do litoral mediterráneo e atlántico peninsular, así como as Illes Balears.

Mención especial requiren as inundacións provocadas polas enchentes do río Ebro durante o mes de febreiro e os primeiros días de marzo. Tras un primeiro episodio provocado polas intensas precipitacións rexistradas entre o 31 de xaneiro e o 6 de febreiro e unha primeira fase de desxeo, que ocasionou importantes aumentos dos caudais de varios afluentes da marxe esquerda do Ebro, as intensas choivas do pasado 25 de febreiro e un desxeo acelerado polo aumento das temperaturas xeraron un segundo episodio de enchentes na última semana de febreiro e primeiros días de marzo, que afectou fundamentalmente a provincia de Zaragoza. O río acadou niveis descoñecidos nos últimos 20 anos e nunha primeira estimación alagou preto de 20.000 hectáreas de terreo. Obrigouse tamén a desaloxar unhas 1.500 persoas e resultaron afectadas numerosas poboacións da ribeira alta e baixa do Ebro.

Estes temporais e inundacións alteraron significativamente a vida cotiá dos cidadáns e o normal funcionamento das comunicacións. Os danos, aínda por avaliar na súa totalidade, afectaron infraestruturas de titularidade pública estatal, tales como a rede de estradas e as infraestruturas ferroviarias, o dominio público marítimo-terrestre e hidráulico, así como outras infraestruturas de titularidade municipal. Así mesmo, ocasionáronse danos en bens de titularidade privada (vivendas, garaxes, instalacións comerciais e industriais e explotacións agrícolas).

Ben que o temporal de choiva, neve e fenómenos costeiros iniciado a finais do mes de xaneiro se pode dar por concluído, aínda non se puido levar a cabo unha valoración definitiva dos danos causados, basicamente pola situación en que se atopan algunhas das zonas afectadas. Doutra banda, persisten os efectos das riadas na bacía do Ebro e as previsións meteorolóxicas impiden descartar que nas próximas semanas se poidan repetir episodios de choiva, neve e vento análogos aos que provocaron o temporal, aínda que de forma esporádica e localizada en puntos moi concretos da xeografía española.

Por iso, optouse por non demorar a adopción de medidas que contribúan a restablecer o normal funcionamento dos servizos públicos, recuperar as zonas afectadas polo temporal e paliar os danos producidos ata o momento da adopción deste real decreto lei. Sen prexuízo disto, e ante a eventualidade de que se poidan reiterar estes fenómenos daniños, prevese a posibilidade de que o Goberno, mediante real

decreto, poida estender a aplicación destas medidas a outros danos que poidan acaecer ata o 31 de maio de 2015. En ambos os casos, con suxeición ás dispoñibilidades orzamentarias.

Con fundamento no principio constitucional de solidariedade, e tendo en conta os de equidade e igualdade de trato en relación con situacións precedentes, este real decreto lei regula un conxunto de axudas específicas, e outras medidas de índole fiscal e laboral atribuídas á competencia de distintos departamentos ministeriais, e responde a unha necesidade inaprazable, cal é a de facer fronte ás situacións de emerxencia ou de natureza catastrófica causadas polo temporal, polo que se acredita o requisito da extraordinaria e urxente necesidade que o artigo 86 da Constitución establece como presuposto habilitante.

Na súa virtude, en uso da autorización contida no artigo 86 da Constitución, por proposta da vicepresidenta do Goberno e ministra da Presidencia, e dos ministros do Interior, de Facenda e Administracións Públicas, de Fomento, de Emprego e Seguridade Social, e de Agricultura, Alimentación e Medio Ambiente, logo de deliberación do Consello de Ministros na súa reunión do día 6 de marzo de 2015,

DISPOÑO:

Artigo 1. *Ámbito de aplicación.*

1. As medidas establecidas neste real decreto lei aplicaráselles ás persoas e aos bens afectados polos danos causados polos temporais de choiva e neve e polos fenómenos costeiros e inundacións acaecidos en xaneiro, febreiro e marzo de 2015, nas comunidades autónomas que resultaron afectadas por eles.

2. Os termos municipais e núcleos de poboación afectados aos cales concretamente sexan de aplicación as medidas aludidas determinaranse por orde do ministro do Interior. Para ese efecto, poderanse entender tamén incluídos aqueloutros termos municipais ou núcleos de poboación en que, para a correcta execución das obras necesarias, sexan imprescindibles as actuacións dos departamentos ministeriais competentes.

3. O Goberno, mediante real decreto, poderá declarar, con delimitación dos municipios e núcleos de poboación afectados, a aplicación das medidas previstas neste real decreto lei a outros sucesos de características similares que poidan acaecer en calquera comunidade autónoma ata o 31 de maio de 2015.

Artigo 2. *Axudas destinadas a paliar danos persoais, danos materiais en vivenda e enxoval, e en explotacións agrarias, establecementos industriais, mercantís, marítimo-pesqueiros, turísticos e doutros servizos.*

1. As axudas previstas neste artigo esténdense aos casos de falecemento e aos supostos de incapacidade causados directamente polos sinistros a que se refire este real decreto lei, e réxense polo disposto no Real decreto 307/2005, do 18 de marzo, polo que se determinan as subvencións en atención a determinadas necesidades derivadas de situacións de emerxencia ou de natureza catastrófica, e se establece o procedemento para a súa concesión.

2. As axudas derivadas da destrución ou danos en vivenda e enxoval rexeranse igualmente polo establecido no Real decreto 307/2005, do 18 de marzo. Co obxecto de acreditar a titularidade sobre os inmobles afectados polos sinistros, admitirase como medio de proba calquera documento que demostre o dito título, tales como o recibo de pagamento do imposto sobre bens inmobles ou outros de análoga natureza.

3. As persoas físicas e xurídicas e as comunidades de bens titulares de establecementos industriais, mercantís, marítimo-pesqueiros, turísticos e doutros servizos serán igualmente obxecto de axudas segundo o establecido no Real decreto 307/2005, do 18 de marzo.

No caso de que o interesado fose indemnizado polo Consorcio de Compensación de Seguros con aplicación da franquía prevista no artigo 9 do Regulamento do seguro de

riscos extraordinarios, aprobado polo Real decreto 300/2004, do 20 de febreiro, poderase conceder unha subvención de ata o 7 por cento da contía dos danos indemnizables producidos polo sinistro, ata o importe máximo de 8.000 euros recollido no artigo 28 do Real decreto 307/2005, do 18 de marzo, sen que, en ningún caso, a suma desta subvención e a indemnización que corresponda aboar en concepto de seguro, ou calquera outra subvención ou axuda pública ou privada a que se teña dereito, poida superar o valor do dano ou prexuízo producido.

Nestes casos, o interesado deberá presentar unha certificación expedida pola súa entidade aseguradora acreditativa de que esta non aboou en todo ou en parte o importe correspondente á franquía legal aplicada polo Consorcio de Compensación de Seguros.

4. Serán igualmente obxecto das axudas establecidas nos artigos 27 e 28 do Real decreto 307/2005, do 18 de marzo, os titulares de explotacións agrícolas e gandeiras que, tendo pólizas amparadas polo Plan de seguros agrarios combinados e estando situadas no ámbito de aplicación sinalado no artigo 1, sufrisen danos en elementos afectos á explotación que non sexan asegurables.

Nestes casos, poderase conceder unha subvención de ata o 70% dos danos valorados por un perito colexiado, ata un importe máximo de 8.000 euros, sen que, en ningún caso, a suma desta subvención e calquera outra subvención ou ingreso público ou privado a que se teña dereito poida superar o valor do dano ou prexuízo producido. Cando se trate de camiños, o informe pericial deberá conter, en todo caso, un esbozo dos camiños afectados de acordo coa información rexistrada no Sistema de información xeográfica de identificación de parcelas agrícolas (Sixpac). Poderanse computar como gasto subvencionable os honorarios derivados da elaboración do informe ata un máximo de 300 euros.

Os interesados acreditarán a titularidade sobre os elementos danados mediante unha póliza de seguro en vigor amparada polo Plan de seguros agrarios combinados. Para estes efectos, aceptárase tamén unha póliza da campaña anterior nos supostos recollidos no artigo 9.2.a) deste real decreto lei.

Así mesmo, para acreditar o exercicio da actividade empresarial ou profesional, os interesados autorizarán expresamente o órgano xestor para solicitar da Axencia Estatal de Administración Tributaria a información pertinente do Censo de Empresarios, Profesionais e Retedores.

5. As solicitudes para a concesión destas axudas serán tramitadas polas delegacións ou polas subdelegacións do Goberno nas comunidades autónomas afectadas, presentaranse no prazo de dous meses, contados a partir da entrada en vigor deste real decreto lei e serán resoltas polo ministro do Interior no prazo de tres meses, contados desde a presentación da solicitude.

6. As axudas que se concedan en aplicación do previsto neste artigo financiaranse con cargo aos créditos dos conceptos 472, 482, 771 e 782 da aplicación orzamentaria 16.01.134M «Para atencións de toda orde motivadas por sinistros, catástrofes ou outros de recoñecida urxencia», dotados con carácter de ampliables no vixente orzamento do Ministerio do Interior.

Artigo 3. *Réxime aplicable ás axudas a persoas físicas ou xurídicas que realizen prestacións persoais e de bens, e réxime de axudas a corporacións locais.*

1. As axudas ás persoas físicas ou xurídicas que realizen prestacións persoais e de bens rexeranse polo disposto no Real decreto 307/2005, do 18 de marzo.

2. As axudas a corporacións locais polos gastos causados para facer fronte a estas situacións de emerxencia rexeranse polo disposto no Real decreto 307/2005, do 18 de marzo, sen que resulten aplicables os límites e importes fixados nos artigos 22 e 23.

Estas axudas non terán por obxecto as reparacións ou reposicións de carácter infraestrutural recollidas no artigo 4 deste real decreto lei. Non obstante, poderanse subvencionar aquelas actuacións inaprazables que, incidindo no mesmo ámbito de aplicación a que se refire o dito artigo, se levaron a cabo co fin de garantir a vida e seguridade das persoas e o funcionamento dos servizos públicos esenciais. Entre estas

actuacións inclúense a evacuación, o aloxamento e a alimentación de persoas afectadas polas catástrofes, a retirada de lodo, neve e xeo, a drenaxe de auga, a retirada de animais mortos, así como a limpeza de vías e zonas públicas que sexan indispensables para os fins descritos.

Para estes efectos, exclúense do dito concepto os traballos levados a cabo con medios propios da corporación local, xa sexan materiais, como maquinaria ou ferramentas, xa humanos, entendendo por tales o persoal contratado con anterioridade aos feitos causantes. En ningún caso serán subvencionables os gastos de persoal xerados por bombeiros, policía local, protección civil e outros de carácter análogo.

3. As solicitudes para a concesión das axudas previstas nos puntos anteriores presentaranse nas delegacións ou nas subdelegacións do Goberno nas comunidades autónomas afectadas, no prazo de dous meses contados a partir da entrada en vigor deste real decreto lei.

4. As axudas que se concedan en aplicación do previsto neste artigo financiaranse con cargo aos créditos dos conceptos 461, 471, e 761 da aplicación orzamentaria 16.01.134M «Para atencións de toda clase motivadas por sinistros, catástrofes ou outros de recoñecida urxencia», dotados con carácter de ampliables no vixente orzamento do Ministerio do Interior.

Artigo 4. Danos en infraestruturas municipais e rede viaria das deputacións provinciais e forais.

Aos proxectos que executen as entidades locais nos termos municipais e núcleos de poboación a que se fai referencia no artigo 1, relativos ás obras de reparación ou restitución de infraestruturas, equipamentos e instalacións e servizos de titularidade municipal, comarcal e das mancomunidades, incluídos no artigo 25.2 da Lei 7/1985, do 2 de abril, reguladora das bases do réxime local, e da rede viaria das deputacións provinciais e forais, consellos insulares, así como das comunidades autónomas uniprovinciais, aplicaráselles o trámite de urxencia e o Estado poderá concederlles unha subvención de ata o 50 por cento do seu custo, excluídos os traballos levados a cabo con medios propios da entidade local, xa sexan materiais, maquinaria ou persoal.

Artigo 5. Actuacións no dominio público hidráulico nas comunidades autónomas afectadas.

Facúltase o ministro de Agricultura, Alimentación e Medio Ambiente para declarar zona de actuación especial para a restauración do dominio público hidráulico das zonas afectadas nas bacías hidrográficas intercomunitarias e para declarar a emerxencia das obras que executará o dito departamento, nas seguintes materias:

- a) Restauración e reparación dos danos causados polas enchentes de augas e polo vento, tanto nas infraestruturas hidráulicas como nas marxes dos ríos.
- b) Limpeza, retirada de tapóns, reparación de desaugadoiros, de colectores, sifóns, drenaxes e similares que reduzan as consecuencias do exceso de auga e que preveñan fronte a futuras enchentes.
- c) Actuacións de reparación en paseos fluviais e marxes dos ríos que afecten outras estruturas lindeiras.

Artigo 6. Actuacións na costa.

Facúltase o ministro de Agricultura, Alimentación e Medio Ambiente para declarar zona de actuación especial para a restauración do dominio público marítimo-terrestre das zonas afectadas e para declarar a emerxencia das obras que executará o dito departamento, nas seguintes materias:

- a) Restauración e demais obras que aseguren a integridade e adecuada conservación do dominio público marítimo-terrestre, así como os traballos

complementarios para asegurar a sustentabilidade da costa e mitigar os efectos de futuros temporais e galernas.

b) Protección e conservación dos elementos que integran o dominio público marítimo-terrestre, en particular a adecuación sustentable de praias e areas, sistemas dunares e zonas húmidas litorais, a súa recuperación e rexeneración, así como a realización, supervisión e control de estudos, proxectos e obras na costa.

c) Reparación e restauración de estruturas danadas no litoral, tales como paseos marítimos, accesos ao dominio público e muros, entre outros.

Artigo 7. Actuacións en infraestruturas rurais de uso xeral nas comunidades autónomas afectadas.

Facúltase o ministro de Agricultura, Alimentación e Medio Ambiente para declarar zona de actuación especial para a restauración de infraestruturas rurais de uso xeral, tales como camiños naturais e vías verdes.

Artigo 8. Danos nas demais infraestruturas públicas.

Facúltanse os titulares dos departamentos ministeriais competentes por razón da materia para declarar as áreas afectadas como zona de actuación especial, para que os ditos departamentos, os seus organismos autónomos e as entidades públicas dependentes deles poidan levar a cabo as actuacións de restauración que procedan. Para os efectos indicados, poderanse declarar de emerxencia as obras que executen tales departamentos para repararen os danos causados en infraestruturas de titularidade estatal comprendidas no seu ámbito de competencias.

Artigo 9. Axudas por danos causados en producións agrícolas e gandeiras.

1. As axudas previstas neste artigo irán destinadas aos titulares das explotacións agrícolas e gandeiras que, tendo pólizas en vigor amparadas polo Plan de seguros agrarios combinados e estando situadas no ámbito de aplicación sinalado no artigo 1, sufrisen perdas superiores ao 30% da súa produción, conforme os criterios da Unión Europea a este respecto.

2. Serán obxecto de axuda:

a) Os danos rexistrados nas explotacións agrícolas e gandeiras para as cales, nas datas do sinistro, non se iniciase o período de subscripción do correspondente seguro, ou este non finalizase e que non formalizasen aínda a póliza para esta campaña, coa condición de que se contratase seguro para a dita produción e cultivo na campaña anterior.

b) Os danos sobre as producións agrícolas e gandeiras que, tendo póliza en vigor para as ditas producións amparada polo sistema de seguros agrarios combinados, non estivesen garantidos polo dito sistema.

c) Os danos orixinados nas producións agrícolas e gandeiras non incluídas no vixente Plan de seguros agrarios combinados.

3. As axudas polos danos causados sobre as producións agrícolas calcularanse tendo en conta as perdas rexistradas sobre a media das producións das tres últimas campañas. No caso de producións leñosas, poderase ter en conta, ademais, unha axuda equivalente ao custo de reposición das plantacións afectadas.

4. Para as restantes producións, a axuda determinarase tendo en conta, na medida en que resulten aplicables, as condicións e os procedementos establecidos no sistema de seguros agrarios.

5. O Ministerio de Agricultura, Alimentación e Medio Ambiente, en coordinación coas comunidades autónomas, establecerá o procedemento para a determinación de todas as axudas previstas neste artigo e a súa contía máxima.

Artigo 10. Beneficios fiscais.

1. Concédese a exención das cotas do imposto sobre bens inmobles correspondentes ao exercicio de 2015 que afecten vivendas, establecementos industriais, turísticos, mercantís, marítimo-pesqueiros e profesionais, explotacións agrarias e forestais, locais de traballo e similares, danados como consecuencia directa dos sinistros a que se refire o artigo 1 deste real decreto lei, cando se acredite que tanto as persoas como os bens situados neles tivesen que ser obxecto de realoxamento total ou parcial noutras vivendas ou locais diferentes ata a reparación dos danos sufridos, ou as desfeitas en colleitas constituían sinistros non cubertos por ningunha fórmula de aseguramento público ou privado.

2. Concédeseelles unha redución no imposto sobre actividades económicas correspondente ao exercicio de 2015 ás industrias de calquera natureza, establecementos mercantís, marítimo-pesqueiros, turísticos e profesionais cuxos locais de negocio ou bens afectados a esa actividade fosen danados como consecuencia directa dos sinistros, sempre que tivesen que ser obxecto de realoxamento ou se producisen danos que obriguen ao peche temporal da actividade. A indicada redución será proporcional ao tempo transcorrido desde o día en que se produciu o cesamento da actividade ata o seu reinicio en condicións de normalidade, xa sexa nos mesmos locais, xa sexa noutros habilitados para o efecto, sen prexuízo de considerar, cando a gravidade dos danos producidos dea orixe a iso, o suposto de cesamento no exercicio daquela, que producirá efectos desde o día 31 de decembro de 2014.

3. As exencións e reducións de cotas nos tributos sinalados nos puntos anteriores comprenderán as das recargas legalmente autorizadas sobre eles.

4. Os contribuíntes que, tendo dereito aos beneficios establecidos nos puntos anteriores, satisfixesen os recibos correspondentes ao dito exercicio fiscal, poderán pedir a devolución das cantidades ingresadas.

5. Estarán exentas das taxas do organismo autónomo Xefatura Central de Tráfico establecidas pola Lei 16/1979, do 2 de outubro, a tramitación das baixas de vehículos solicitadas como consecuencia dos danos producidos polos sinistros, e a expedición de duplicados de permisos de circulación ou de conducción destruídos ou extraviados polas ditas causas.

6. A diminución de ingresos en tributos locais que os anteriores puntos deste artigo produzan nos concellos e nas deputacións provinciais será compensada con cargo aos orzamentos xerais do Estado, de conformidade co establecido no artigo 9 do texto refundido da Lei reguladora das facendas locais, aprobado polo Real decreto legislativo 2/2004, do 5 de marzo.

7. Estarán exentas do imposto sobre a renda das persoas físicas as axudas excepcionais por danos persoais a que se refire o artigo 2.

Artigo 11. Reducións fiscais especiais para as actividades agrarias.

Para as explotacións e actividades agrarias realizadas nas zonas que determine a orde que se dite en execución do disposto no artigo 1 deste real decreto lei, e conforme as previsións contidas no número 4.1.º do artigo 37 do Regulamento do imposto sobre a renda das persoas físicas, aprobado polo Real decreto 439/2007, do 30 de marzo, e no número 3 do artigo 38 do Regulamento do imposto sobre o valor engadido, aprobado polo Real decreto 1624/1992, do 29 de decembro, o Ministerio de Facenda e Administracións Públicas, á vista dos informes do Ministerio de Agricultura, Alimentación e Medio Ambiente, poderá autorizar, con carácter excepcional, a redución dos índices de rendemento neto a que se refire a Orde HAP/2222/2014, do 27 de novembro, pola que se desenvolven para o ano 2015 o método de estimación obxectiva do imposto sobre a renda das persoas físicas e o réxime especial simplificado do imposto sobre o valor engadido.

Artigo 12. Medidas laborais e de Seguridade Social.

1. Os despedimentos colectivos, as suspensións de contrato e as reducións de xornada que teñan a súa causa directa nos danos producidos polos episodios meteorolóxicos descritos no artigo 1.1 deste real decreto lei, así como nas perdas de actividade directamente derivadas deles, nos sectores que se relacionan, que queden debidamente acreditados, terán a consideración de provenientes dunha situación de forza maior, coas consecuencias que derivan dos artigos 47 e 51 do texto refundido da Lei do Estatuto dos traballadores, aprobado polo Real decreto lexislativo 1/1995, do 24 de marzo. No primeiro suposto, a Tesouraría Xeral da Seguridade Social poderá exonerar o empresario do aboamento das cotas da Seguridade Social e por conceptos de recadación conxunta mentres dure o período de suspensión, manténdose a condición do dito período como efectivamente cotizado polo traballador. Nos casos en que se produza a extinción do contrato, as indemnizacións dos traballadores será por conta do Fondo de Garantía Salarial, cos límites legalmente establecidos.

Nos supostos en que a empresa decida a suspensión de contratos ou a redución temporal da xornada de traballo con base en circunstancias excepcionais, o Servizo Público de Emprego Estatal e, de ser o caso, o Instituto Social da Mariña, poderán autorizar que o tempo en que se perciban as prestacións por desemprego, reguladas no título III do texto refundido da Lei xeral da seguridade social, aprobado polo Real decreto lexislativo 1/1994, do 20 de xuño, que deriven de xeito inmediato dos sucesos incluídos no ámbito de aplicación deste real decreto lei, non se compute para os efectos de consumir os períodos máximos de percepción establecidos. Igualmente, poderá autorizar que reciban prestacións por desemprego aqueles traballadores incluídos nos ditos expedientes que carezan dos períodos de cotización necesarios para teren dereito a elas.

2. As empresas e os traballadores por conta propia incluídos en calquera réxime da Seguridade Social poderán solicitar e obter, logo de xustificación dos danos sufridos ou das perdas de actividade directamente derivadas deles, unha moratoria de ata un ano, sen xuro, no pagamento das cotizacións á Seguridade Social e por conceptos de recadación conxunta correspondentes a tres meses naturais consecutivos, contados desde o anterior á produción do sinistro ou, no caso de traballadores incluídos no réxime especial dos traballadores por conta propia ou autónomos, desde o mes en que aquel se produciu.

3. Os cotizantes á Seguridade Social que teñan dereito aos beneficios establecidos nos puntos anteriores e que satisfixesen as cotas correspondentes ás exencións ou á moratoria de que se trate poderán pedir a devolución das cantidades ingresadas, incluídos, de ser o caso, os xuros de demora, as recargas e as custas correspondentes. Se o que ten dereito á devolución é debedor á Seguridade Social por cotas correspondentes a outros períodos, o crédito pola devolución será aplicado ao pagamento de débedas pendentes con aquela na forma que legalmente proceda.

4. Para levar a cabo as obras de reparación dos danos causados, as administracións públicas e as entidades sen ánimo de lucro poderán solicitar do Servizo Público de Emprego competente a adscrición de traballadores perceptores das prestacións por desemprego para traballos de colaboración social, de acordo co disposto no artigo 213.3 do texto refundido da Lei xeral da seguridade social.

Artigo 13. Réxime de contratación.

1. Poderán ter a consideración de obras, servizos ou subministracións de emerxencia, logo do correspondente acordo do órgano de contratación, cumprindo os requisitos do artigo 113 do texto refundido da Lei de contratos do sector público, aprobado polo Real decreto lexislativo 3/2011, do 14 de novembro, os contratos de reparación ou mantemento de infraestruturas, equipamentos ou servizos, así como as obras de reposición de bens prexudicados pola catástrofe, calquera que sexa a súa contía.

2. Declárase urxente a ocupación dos bens afectados polas expropiacións derivadas da realización das obras a que se refire este artigo, para os efectos establecidos no artigo 52 da Lei de expropiación forzosa, do 16 de decembro de 1954.

3. Para a tramitación de expedientes de contratación de obras non incluídas no artigo 126.2 do texto refundido da Lei de contratos do sector público, dispensarase do requisito previo de dispoñibilidade dos terreos, sen prexuízo de que a súa ocupación efectiva deberá ir precedida da formalización da acta de ocupación.

Artigo 14. *Cooperación coas administracións locais.*

1. Facúltase o titular do Ministerio de Facenda e Administracións Públicas para propor o pagamento das subvencións derivadas de danos en infraestruturas, equipamentos e instalacións e servizos de titularidade municipal, comarcal e das mancomunidades, incluídos no artigo 25.2 da Lei 7/1985, do 2 de abril, e da rede viaria das deputacións provinciais e forais, consellos insulares, así como das comunidades autónomas uniprovinciais, ás cales se refire o artigo 4, na parte que financie a Administración xeral do Estado, unha vez efectuadas as valoracións de danos, ata o importe máximo que se determine nos reais decretos de desenvolvemento.

2. Tales subvencións atenderanse con cargo ao crédito que para estes efectos se habilite, co carácter de incorporable, no orzamento do dito departamento.

3. De igual modo, facúltase o titular do Ministerio de Facenda e Administracións Públicas para establecer o procedemento para a concesión das mencionadas subvencións, así como o seu seguimento e control, no marco da cooperación económica do Estado aos investimentos das entidades locais.

Artigo 15. *Consortio de Compensación de Seguros.*

1. O delegado do Goberno na comunidade autónoma afectada poderá solicitar do Consorcio de Compensación de Seguros, para unha máis correcta avaliación dos danos non persoais, as correspondentes valoracións necesarias conforme os artigos 2 e 3 deste real decreto lei, sempre que non afecten bens de titularidade pública.

2. O Consorcio de Compensación de Seguros terá dereito ao aboamento por parte da Administración xeral do Estado dos traballos de peritación conforme o baremo de honorarios profesionais que o dito consorcio teña aprobado para os seus peritos taxadores de seguros.

3. Para facilitar a tramitación das axudas e a valoración dos danos, a Administración competente e o Consorcio de Compensación de Seguros poderanse transmitir os datos sobre beneficiarios das axudas e indemnizacións que concedan, as súas contías respectivas e os bens afectados. As entidades aseguradoras que operen no territorio español estarán obrigadas a subministrarlle ao Consorcio de Compensación de Seguros a información que este lles solicite para dar cumprimento ao disposto anteriormente.

Artigo 16. *Investimentos realizados para reparar os danos incluídos no ámbito de aplicación do real decreto lei.*

Os investimentos realizados para reparar os danos a que se refire o artigo 1 deste real decreto lei polas entidades locais que cumpran cos requisitos establecidos na disposición adicional sexta da Lei orgánica 2/2012, do 27 de abril, de estabilidade orzamentaria e sustentabilidade financeira, terán a consideración de investimentos financeiramente sustentables.

Excepcionalmente, estes investimentos executaranse con carácter prioritario fronte a outros investimentos financeiramente sustentables e non lles resultarán de aplicación os números 1, 2, 4, 6 e 7 da disposición adicional décimo sexta do texto refundido da Lei reguladora das facendas locais, aprobado polo Real decreto legislativo 2/2004, do 5 de marzo.

Disposición adicional primeira. *Límites das axudas.*

O valor das axudas concedidas en aplicación deste real decreto lei, no que a danos materiais se refire, non poderá superar en ningún caso a diferenza entre o valor do dano producido e o importe doutras axudas ou indemnizacións declaradas compatibles ou complementarias que, polos mesmos conceptos, poidan conceder outros organismos públicos, nacionais ou internacionais, ou poidan corresponder en virtude da existencia de pólizas de aseguramento.

Disposición adicional segunda. *Créditos orzamentarios.*

A reparación de danos causados en bens de titularidade da Administración xeral do Estado ou, de ser o caso, das entidades dela dependentes, as subvencións que se concedan en aplicación do disposto no artigo 14, así como as actuacións realizadas en aplicación do disposto nos artigos 7 e 9, financiaranse con cargo ao Fondo de Continxencia de execución orzamentaria.

O Goberno, por proposta do ministro de Facenda e Administracións Públicas, habilitará os créditos correspondentes nos orzamentos dos departamentos ministeriais afectados, de conformidade co previsto nos artigos 50 e 55 da Lei 47/2003, do 26 de novembro, xeral orzamentaria.

Disposición adicional terceira. *Convenios con outras administracións públicas.*

A Administración xeral do Estado poderá celebrar os convenios de colaboración que requira a aplicación deste real decreto lei cos órganos competentes das comunidades autónomas e das corporacións locais afectadas.

Para os efectos da emisión do informe preceptivo e vinculante a que se refire o número un da disposición adicional primeira da Lei 36/2014, do 26 de decembro, de orzamentos xerais do Estado para o ano 2015, teranse especialmente en conta as circunstancias que xustifican a adopción das medidas reguladas neste real decreto lei.

Disposición adicional cuarta. *Comisión interministerial de seguimento das medidas de apoio a damnificados.*

1. Créase unha comisión interministerial para a aplicación das medidas de apoio previstas neste real decreto lei, coordinada pola Dirección Xeral de Protección Civil e Emerxencias, e integrada polos representantes dos ministerios da Presidencia, do Interior, de Facenda e Administracións Públicas, de Fomento, de Emprego e Seguridade Social, e de Agricultura, Alimentación e Medio Ambiente, así como polos delegados do Goberno nas comunidades autónomas afectadas e por un representante do Consorcio de Compensación de Seguros.

2. O seguimento das medidas de apoio previstas neste real decreto lei levarao a cabo a comisión a que se refire o punto anterior, en coordinación coas autoridades das comunidades autónomas, a través das respectivas delegacións do Goberno.

3. Antes do 30 de outubro de 2015, a comisión interministerial elaborará un informe sobre as actuacións levadas a cabo en execución deste real decreto lei.

Disposición adicional quinta. *Non incremento de custos de persoal*

As medidas previstas neste real decreto lei levaranse a cabo coas dotacións actuais de persoal, sen incremento de retribucións nin doutros custos de persoal.

Disposición derradeira primeira. *Título competencial.*

Este real decreto lei dítase ao abeiro do disposto nas regras 7.^a, 13.^a, 14.^a, 17.^a, 23.^a e 29.^a do artigo 149.1 da Constitución, sen prexuízo das medidas adicionais de protección que adoptasen ou poidan adoptar as comunidades autónomas afectadas.

Disposición derradeira segunda. *Avaliación de impacto ambiental.*

Mediante acordo do Consello de Ministros determinarase a exención de avaliación de impacto ambiental daquelas obras de reparación ou rehabilitación de infraestruturas, equipamentos ou instalacións a que se refiren os artigos 4, 5, 6, 7 e 8 que, debendo someterse a avaliación de impacto ambiental, conforme o artigo 7 da Lei 21/2013, do 9 de decembro, de avaliación ambiental, quedarán exentas da realización do dito trámite en cumprimento do disposto no artigo 8, números 3 e 4, da mencionada Lei 21/2013, do 9 de decembro.

Disposición derradeira terceira. *Facultades de desenvolvemento.*

O Goberno e os titulares dos distintos departamentos ministeriais, no ámbito das súas respectivas competencias, ditarán as disposicións necesarias e establecerán os prazos para a execución do disposto neste real decreto lei.

Disposición derradeira cuarta. *Entrada en vigor.*

Este real decreto lei entrará en vigor o mesmo día da súa publicación no «Boletín Oficial del Estado».

Dado en Madrid o 6 de marzo de 2015.

FELIPE R.

O presidente do Goberno,
MARIANO RAJOY BREY